

Biri İstanbul'da Diğeri Ankara'da İki Daire Kurulması Hakkında Karârname

Kanûn-ı esâsinin yüz beş, yüz altı ve yüz yedinci maddelerinde emvâl-i devletin kabz ve sarfına me'mûr olanlar muhâsebelerini rûyet ve devâirden tanzîm olunan sal muhâsebelerini tedkik iderek hülâsa-i tedkikât ve netice-i mütalaatını her sene bir takrir-i mahsûsla Hey'et-i Mebusana 'arz eylemek üzere bir Divân-ı Muhâsebat teşkil olunacağı ve iş bu Divân-ı Muhâsebat'ın a'zâ-yı mürettebi on iki olup bunların evsâf ve vezâ'ifinin tafsilâtının bir nizâmnâme ile ta'yîn idileceği muharrer olup buna istinâden 11 Zilhicce sene 1295 târîhli bir karârname tanzîm idildiği ve 6 Teşrînevel sene 332 târîhli nizâmnâme ve 2 Mart sene 334 tarihli bir kanûn ile ba'zı mevâddı tâ'dil ve Usûl-i Muhâsebe-i 'Umûmiye Kanûnu'yla da masârifâtının kabl'l-tediye murâkabe-i vâzifesi de tahmîl idildiği ve bu suretle teşekkül iden Divân-ı Muhâsebat İstanbul'un hükümet-i millîyeye iltihakı târîhine kadar devam eylediği ve bi't-tabî 'umûm meyanında lağv idildiği, halbuki Teşkilât-ı Esasiye Kânûnu'nda Kânûn-ı Esâsi'nin sâlifü'l-'arz mevâdının ta'dilini mutazammın bir kayıt bulunmadığı gibi Büyük Millet Meclisi'nce kabul edilmiş 28 Şubat sene 38 târîhli kânûnun beşinci maddesinde de vâridât ve masârifât-ı devletin muvâzene ve muhâsebe-i 'umûmiye kânûnlarına ve bütçe füsul ve mevâddına muvâfik olarak cibâyet ve masarîfin temini için gerek kabl'l-sarf ve gerek bâde'l-sarf meclis namına murâkabe me'mûr olmak üzere Divân-ı Muhâsebat'ın teşkiline kadar Müdâfa'a-i Millîye ve Mâliye Vekâletleri için üçer ve diğeri vekâletler için birer muhtelit a'zânın hey'et-i 'umûmiyece intihâb ve tefrik olunacağı zikr edilmeğle meclis-i müşârunileyhâca da Divân-ı Muhâsebat'ın lüzûm-ı teşkilî kabul edildiği ve gerçi mevzû'-i bahs murâkabe me'mûrları ta'yîn ve tefrik olunmuş ise de murâkabenin sûret-ü şekl icrâ-yı Meclis-i Âlice teşebbüs edilmediği cihetle devâir-i sarfiyatının murâkabe ve vizesi icrâ ve te'mîn idilemediği ve bütün mütemeddin devletlerde teşkilât-ı mezkûrenin kabul ve tatbik edilmesi hizmet-i 'umûmiye-i devletin kavânîn ve nizâmât ve mukarrerât mevzû'â dâ'iresinde te'mîn cereyânı noktasına ma'tûf tedâbirden olmasına ve Anadolu-yı garbînin ve Trakya'nın istilas ve İstanbul'un hükümet-i millîyeye iltihâkı dolayısıyla da murâkabenin tevsî' ve tenevvü'ü iş bu teşkilâtın bir an evvel hükümet-i millîyede de icrâsını emr olmasına mebni hükümetimizce de mevcut şerâ'it dâ'iresinde bir Divân-ı Muhâsebat teşkilî ile bütçeden mütevellid ta'ahhüdât ve sarfiyatımızın usûl-i maliye dâ'iresinde murâkabe ve vize edilmesi muktezi görüldüğü ve işte bu lüzûm-ı mertebe üzerine 339 senesi muvâzene-i 'umûmiyesine Divân-ı Muhâsebat teşkilâtına muktezi tahsisât ve kadroda mevzû' bulunduğu gibi 329 senesi üç aylığı için 28 Şubat sene 339 târîhli kânûnla verilen avansdan otuz dokuz bin lirası da kânûna merbût cedvel ile Divân-ı Muhâsebat'a tefrik edildiği ve şu suretle Dîvânın fi'ilen teşkiline meclisce de muvâfakat buyrulduğu ve ancak gerek hâkimiye-i millîye noktasından ve gerekse de öteden beri Dîvânın ifâ eylediği hizmetin meclis nâmına niyâbeten? olmasından dolayı re'is-i evvelin meclisce intihâbı muvâfik görüldüğü ve muahharan bu cihet-i meclise 'arz ve bi'l-ahere lüzûmuna mebni tevsî' ve tezeyyüd idilmek üzere şimdilik birisi İstanbul'da ve diğeri Ankara'da ifâ-yı vazife itmek şartıyla iki dâ'ire ittihâzıyla altı zatın intihâb ve ta'yîni ve bunlardan ikisinin re'is-i sâni olarak tefriki maliye vekâletinin 24/4/39 târîhli ve muhâsebe-i maliye müdüriyeti 746/441 numrolu tezkeresinde bildirilmesine binâen keyfiyet İcrâ Vekilleri Heyeti'nin 24/4/39 târîhli ictimâ'ında lede'l-zikr vekâlet-i müşârunileyhânın teklifleri kabul ve derhal tatbîki takarrur itmiştir.

24/4/ 339

Hariciye Vekâleti Vekîli, Dâhiliye Vekîli, 'Adliye Vekâleti Vekîli, Müdâfa'a-i Millîye Vekîli, Şer'îye Vekîli, Ümerâ Vekilleri Hey'et-i Reisi, Erkân-ı Harbiye-i 'Umûmiye Vekâleti Vekîli, Sıhhiye ve Mu'avenet-i İctimâ'îye Vekâleti, İktisad Vekîli, Nafia Vekîli

Türkiye Büyük Millet Meclisi Reisi,

BCA, Nu. 030-0-018-001-001-7-17-4., Tarih 24.4.[1]339 [5 Ocak 1921]

